

岳阳集

张
说

文硕阁

wenshuoge.com

目录

关于我们	5
赠赵公	7
岳州作	8
岳州行郡竹篱	9
游洞庭湖湘	10
灊湖山寺	11
出湖寄赵冬曦	12
岳阳早霁南楼	13
岳阳石门墨山	14
和尹懋秋夜游灊湖	15
岳州宴别潭州王熊	16
岳州宴别潭州王熊二	17
广州萧都督入朝过岳州	18
岳州别姚司马绍之	19
送岳州李十从军桂州	20
岳州别赵国公王十一琚入朝	21
岳州别子均	22
岳州山城	23
和尹懋秋夜游灊湖	24
与赵冬曦尹懋子均登南楼	25
游灊湖上寺	26
岳州赠广平公宋大夫	27
荆州亭入朝	28
岳州守岁	29
同赵侍御巴陵早春作	30
灊湖山寺	31
岳州别梁六入朝	32
岳州西城	33
岳州观竞渡	34
对酒行，巴陵作	35
岳州宴姚绍之	36
岳州九日宴道观西阁	37
岳州作	38
游洞庭湖	39
巴丘春作	40
岳州夜坐	41

别灊湖	42
岳州守岁	43
岳州守岁二	44
岳州看黄叶	45
和尹从事懋泛洞庭	46
送梁六自洞庭山作	47
翻着葛巾呈赵尹	48
和朱使欣道峡似巫山之作	49
和尹懋登南楼	50
九日巴丘登高	51
和尹懋秋夜游灊湖一	52
和尹懋秋夜游灊湖二	53
岳阳晚景	54
奉和岳州山城	55
奉和张岳州王潭州别诗一	56
奉和张岳州王潭州别诗二	57
陪张燕公登南楼	58
酬燕公出湖见寄	59
奉和张燕公早霁南楼	60
灊湖作	61
和燕公岳州山城	62
和尹懋秋夜游灊湖一	63
和尹懋秋夜游灊湖二	64
陪燕公游灊湖上寺	65
答张燕公翻着葛巾见呈之作	66
奉答燕公	67
奉答燕公	68
陪张燕公行郡竹篱	69
和燕公别灊湖	70
奉陪张燕公登南楼	71
秋夜陪张丞相赵侍御游灊湖一	72
秋夜陪张丞相赵侍御游灊湖二	73
同燕公泛洞庭	74
奉答燕公	75
自荆湖入朝至岳阳奉别张燕公	76
游灊湖上寺	77
和张燕公湘中九日登高	78
奉别张岳州说一	79

奉别张岳州说二 80

入朝别张燕公 81

道峡似巫山 82

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

赠赵公

湘东股肱守，心与帝乡期。

舟楫中途蹇，风波复来思。

嘉我常联翼，金貂侍玉墀。

迹参前马圣，名缀鬻熊师。

寒暑一何速，山川远间之。

宁知洞庭上，独得平生时。

精意微绝简，从权讨妙棋。

林壑为予请，纷霭发华滋。

流赏忽已散，惊帆杳难追。

送君在南浦，侘傺投此词。

岳州作

夜梦云阙间，从容簪履列。

朝游洞庭上，缅望京华绝。

潦收江未清，火退山更热。

重欷视欲醉，憎满气如噎。

器留鱼鳖腥，衣点蚊虻血。

发白思益壮，心玄用弥拙。

冠剑日苔藓，琴书坐废撤。

唯有报恩字，刻意长不灭。

岳州行郡竹篱

山郡不沟郭，荒居无翳壅。

爱人忠主利，善守闭为勇。

苟非小勤瘁，安得期逸宠。

版筑恐土疏，襄城嫌役重。

藩栅聊可固，筠篁近易奉。

差池截浦沙，缭绕缘隈垄。

矗似长云亘，森如高戟耸。

预绝豺狼忧，知免牛羊恐。

间里宽矫步，榛丛恣踏踵。

始果游处心，终日成闲拱。

游洞庭湖湘

缅邈洞庭岫，葱蒙水雾色。
宛在太湖中，可望不可即。
剖竹守穷渚，开门对奇域。
城池自萦笼，纓绶为徽纆。
靡日不思往，经时始愿克。
飞棹越溟波，维舟恣攀陟。
窈窕入云步，崎岖倚松息。
岩坛有鹤过，壁字无人识。
滴石香乳溜，垂崖灵草植。
玩幽轻雾阻，讨异忘曛逼。
寒沙际水平，霜树笼烟直。
空宫闻莫睹，地道窥难测。
此处学金丹，何人生羽翼。
谁传九光要，几拜三仙职。
紫气徒想像，清潭长眇默。
霓裳若有来，覩我云峰侧。

灏湖山寺

楚老游山寺，提携观画壁。

扬袂指辟支，睺眄相斗阅。

险哉透撞儿，千金赌一掷。

成败身自受，傍人那叹息。

出湖寄赵冬曦

西泛平湖尽，参差入乱山。

东瞻岳阳郡，汗漫太虚间。

窘步同行乐，遘文互屡看。

山戍上云桂，江亭临水关。

川途倏忽间，风景依如昨。

湘浦未赐环，荆门犹主诺。

何时与美人，载酒游宛洛。

岳阳早霁南楼

山水佳新霁，南楼玩初旭。

夜来枝半红，雨后洲全绿。

四运相终始，万形纷代续。

适临青草湖，再变黄莺曲。

地穴穿东武，江流下西蜀。

歌闻枉渚迢，舞见长沙促。

心阻意徒驰，神和生自足。

白发悲上春，知常谢先欲。

岳阳石门墨山

岳阳石门墨山二山相连，有禅堂，观天下绝境

困轮江上山，近在华容县。

常涉巴丘首，天晴遥可见。

佳游屡前诺，芳月愆幽眷。

及此符守移，欢言临道便。

既携赏心客，复有送行掾。

竹径入阴窞，松萝上空蒨。

草共林一色，云与峰万变。

探窥石门断，缘越沙涧转。

两山势争雄，峰巘相顾眄。

药妙灵仙宝，境华岩壑选。

清都西渊绝，金地东敞宴。

池果接园畦，风烟迥台殿。

高寻去石顶，旷览天宇遍。

千山纷满目，百川豁对面。

骑来云气迎，人去鸟声恋。

长揖桃源士，举世同企羡。

和尹懋秋夜游澱湖

坐啸人事闲，佳游野情发。

山门送落照，湖口升微月。

林寻猿狖居，水戏鼃鼃穴。

朔风吹飞雁，芳草亦云歇。

岳州宴别潭州王熊

丝管清且哀，一曲倾一杯。

气将然诺重，心向友朋开。

古木无生意，寒云若死灰。

赠君芳杜草，为植建章台。

岳州宴别潭州王熊二

缙云连省阁，沟水遽西东。

然诺心犹在，荣华岁不同。

孤城临楚塞，远树入秦宫。

谁念三千里，江潭一老翁。

广州萧都督入朝过岳州

广州萧都督入朝过岳州，宴饯，得冬字

孤城抱大江，节使往朝宗。

果是台中旧，依然水上逢。

京华遥比日，疲老飒如冬。

窃羨能言鸟，衔恩向九重。

岳州别姚司马绍之

（制许归侍）

和玉悲无已，长沙宦不成。

天从扇枕愿，人遂倚门情。

方外怀司马，江东忆步兵。

问君栖泊处，空岭夜猿惊。

送岳州李十从军桂州

送客之江上，其人美且才。

风波万里阔，故旧十年来。

剑拔蛟随断，弓张鸟自摧。

阳桥书落落，驿马定先回。

岳州别赵国公王十一琚入朝

昔滥貂蝉长，同承雨露霏。

今参鱼鳖守，望美洞庭归。

浦树悬秋影，江云烧落辉。

离魂似征帆，恒往帝乡飞。

岳州别子均

离筵非燕喜，别酒正销魂。

念汝犹童孺，嗟予隔远藩。

津亭拔心草，江路断肠猿。

他日将何见，愁来独倚门。

岳州山城

山城丰日暇，闭户见天心。

东旷迎朝色，西楼引夕阴。

书观千载近，学静二毛深。

忽有南风至，吹君堂上琴。

和尹懋秋夜游澱湖

澱湖佳可游，既近复能幽。

林里栖精舍，山间转去舟。

雁飞江月冷，猿啸野风秋。

不是迷乡客，寻奇处处留。

与赵冬曦尹懋子均登南楼

危楼泻洞湖，积水照城隅。

命驾邀渔火，通家引凤雏。

山晴红蕊匝，洲晓绿苗铺。

举目思乡县，春光定不殊。

游澗湖上寺

湖上奇峰积，山中芳树春。

何知绝世境，来遇赏心人。

清旧岩前乐，呦嚶鸟兽驯。

静言观听里，万法自成轮。

岳州赠广平公宋大夫

亚相本时英，归来复国桢。

朝推长孺直，野慕隐之清。

传节还闽嶂，皇华入汉京。

宁思江上老，岁晏独无成。

荊州亭入朝

巫山云雨峡，湘水洞庭波。

九辨人犹摈，三秋雁始过。

旃裘吴地尽，髻荐楚言多。

不果朝宗愿，其如江汉何。

岳州守岁

除夜清樽满，寒庭燎火多。

舞衣连臂拂，醉坐合声歌。

至乐都忘我，冥心自委和。

今年只如此，来岁知如何。

同赵侍御巴陵早春作

江上春来早可观，巧将春物妒余寒。

水苔共绕留乌石，花鸟争开斗鸭栏。

佩胜芳辰日渐暖，然灯美夜月初圆。

意随北雁云飞去，直待南州蕙草残。

灏湖山寺

空山寂历道心生，虚谷迢迢野鸟声。

禅室从来尘外赏，香台岂是世中情。

云间东岭千寻出，树里南湖一片明。

若使巢由知此意，不将萝薜易簪缨。

岳州别梁六入朝

远莅长沙渚，欣逢贾谊才。

江山疲应接，风日复晴开。

江树云间断，湘山水上来。

近洲朝鹭集，古戍夜猿哀。

岸杼含苍朮，河蒲秀紫台。

月余偏地赏，心尽故人杯。

自我违京洛，嗟君此溯洄。

容华因别老，交旧与年颓。

梦见长安陌，朝宗实盛哉。

岳州西城

水国何辽旷，风波遂极天。

西江三纪合，南浦二湖连。

危堞临清境，烦忧暂豁然。

九围观掌内，万象阅眸前。

日去长沙渚，山横云梦田。

汀葭变秋色，津树入寒烟。

潜穴探灵诡，浮生揖圣仙。

至今人不见，迹灭事空传。

岳州观竞渡

画作飞凫艇，双双竞拂流。

低装山色变，急棹水华浮。

土尚三闾俗，江传二女游。

齐歌迎孟姥，独舞送阳侯。

鼓发南湖溇，标争西驿楼。

并驱常诧速，非畏日光遒。

对酒行，巴陵作

留侯封万户，园令寿千金。

本为成王业，初由赋上林。

繁荣安足恃，霜露递相寻。

鸟哭楚山外，猿啼湘水阴。

梦中城阙近，天畔海云深。

空对忘忧酌，离忧不去心。

岳州宴姚绍之

杞梓滞江滨，光华向日新。

难兄金作友，媚子玉为人。

山水含秋兴，池亭借善邻。

檐松风送静，院竹鸟来驯。

翠斝吹黄菊，雕盘鲙紫鳞。

缓歌将醉舞，为拂绣衣尘。

岳州九日宴道观西阁

摇落长年叹，蹉跎远宦心。

北风嘶代马，南浦宿阳禽。

佳此黄花酌，酣余白首吟。

凉云霾楚望，濛雨蔽荆岑。

登眺思清景，谁将眷浊阴。

钓歌出江雾，樵唱入山林。

鱼以嘉名采，木为美材侵。

大道由中悟，逍遥匪外寻。

参佐多君子，词华妙赏音。

留题洞庭观，望古意何深。

岳州作

水国生秋草，离居再及瓜。

山川临洞穴，风日望长沙。

物土南州异，关河北信赊。

日昏闻怪鸟，地热见修蛇。

远人梦归路，瘦马嘶去家。

正有江潭月，徘徊恋九华。

游洞庭湖

平湖晓望分，仙峤气氛氲。

鼓枻乘清渚，寻峰弄白云。

江寒天一色，日静水重纹。

树坐参猿啸，沙行入鹭群。

缘源斑筱密，冒径绿萝纷。

洞穴传虚应，枫林觉自熏。

双童有灵药，愿取献明君。

巴丘春作

日出洞庭水，春山挂断霞。

江沔相映发，卉木共纷华。

湘戍南浮阔，荆关北望赊。

湖阴窥魍魎，丘势辨巴蛇。

岛户巢为馆，渔人艇作家。

自怜心问景，三岁客长沙。

岳州夜坐

炎洲苦三伏，永日卧孤城。

赖此闲庭夜，萧条夜月明。

独歌还太息，幽感见余声。

江近鹤时叫，山深猿屡鸣。

息心观有欲，弃知返无名。

五十知天命，吾其达此生。

别灊湖

念别灊湖去，浮舟更一临。

千峰出浪险，万木抱烟深。

南郡延恩渥，东山恋宿心。

露花香欲醉，时鸟啭余音。

涉趣皆留赏，无奇不遍寻。

莫言山水间，幽意在鸣琴。

岳州守岁

夜风吹醉舞，庭户对酣歌。

愁逐前年少，欢迎今岁多。

岳州守岁二

桃枝堪辟恶，爆竹好惊眠。

歌舞留今夕，犹言惜旧年。

岳州看黄叶

白首看黄叶，徂颜复几何。

空惭棠树下，不见政成歌。

和尹从事懋泛洞庭

平湖一望上连天，林景千寻下洞泉。

忽惊水上光华满，疑是乘舟到日边。

送梁六自洞庭山作

巴陵一望洞庭秋，日见孤峰水上浮。

闻道神仙不可接，心随湖水共悠悠。

翻着葛巾呈赵尹

昔日接罍倒，今我葛巾翻。

宿酒何时醒，形骸不复存。

忽闻有嘉客，躡步出闲门。

桃花春径满，误识武陵源。

和朱使欣道峡似巫山之作

江如晓天净，石似暮霞张。

征帆一流览，宛若巫山阳。

楚客思归路，秦人谪异乡。

猿鸣孤月夜，再使泪沾裳。

和尹懋登南楼

张均（以下为张说之子诗作）

客来已两春，更瞻韶光早。

花鸟既环合，江山复骈抱。

楼形写北潭，堞势凌青岛。

白云谢归雁，驰怀洛阳道。

九日巴丘登高

张均

客心惊暮序，宾雁下沧洲。

共赏重阳节，言寻戏马游。

湖风扶戍柳，江雨暗山楼。

且酌东篱酒，聊祛南国忧。

和尹懋秋夜游澱湖一

张均

远水沉西日，寒沙聚夜鸥。

平湖乘月满，飞棹接星流。

黄叶鸣凄吹，苍葭扫暗洲。

愿移沧浦赏，归待颍川游。

和尹懋秋夜游澗湖二

张均

湾潭幽意深，杳霭涌寒岑。

石痕秋水落，岚气夕阳沉。

澄彻天为底，渊玄月作心。

青溪非大隐，归弄白云浔。

岳阳晚景

张均（一作其父张说诗）

晚景寒鸦集，秋风旅雁归。

水光浮日出，霞彩映江飞。

洲白芦花吐，园红柿叶稀。

长沙卑湿地，九月未成衣。

奉和岳州山城

张垚

（一作张均诗，奉和，应该是和其父张说《岳州山城》）

郡馆临清赏，开局坐白云。

讼虚棠户曙，观静竹檐曛。

悬榻迎宾下，趋庭学礼闻。

风传琴上意，遥向日华纷。

奉和张岳州王潭州别诗一

韦嗣立

茂先王佐才，作牧楚江隈。

登楼正欲赋，复遇仲宣来。

黄鹄飞将远，雕龙文为开。

宁知昔联事，听曲有余哀。

奉和张岳州王潭州别诗二

韦嗣立

昔时陪二贤，纓冕会神仙。

一去驰江海，相逢共播迁。

无因千里驾，忽睹四愁篇。

览讽欢何已，欢终徒怆然。

陪张燕公登南楼

赵冬曦

抑郁何以欢，阴氛亦登望。

孤岛轻雾里，行舟白波上。

目劳西北云，心醉东南嶂。

昔日青谿子，胡然此无状。

酬燕公出湖见寄

赵冬曦

纶綍有成命，旌麾不可攀。

湘川朝目断，荆阙夕波还。

果枉东瞻唱，兴言夕放闲。

携琴仙洞中，置酒澗湖上。

芳景恣行乐，谪居忽如忘。

聚散本相因，离情自悲怅。

鸾翮非常戢，鹏天会昭旷。

永怀宛洛游，曾是弹冠望。

奉和张燕公早霁南楼

赵冬曦

方曙跻南楼，凭轩肆遐瞩。

物华荡暄气，春景媚晴旭。

川霁湘山孤，林芳楚郊缙。

列岩重叠翠，远岸逶迤绿。

风帆摩天垠，鱼艇散弯曲。

鸿归鹤舞送，猿叫莺声续。

群动皆熙熙，噫予独羁束。

常钦才子意，忌鵬伤蹢躅。

雅尚骚人文，怀沙何迫促。

未知二贤意，去矣从所欲。

灏湖作

赵冬曦

三湖返入两山间，畜作灏湖弯复弯。
暑雨奔流潭正满，微霜及潦水初还。
水还波卷溪潭涸，绿草芊芊岸崭崭。
适来飞棹共回旋，已复扬鞭恣行乐。
道旁耆老步跼跼，楚言兹事不知年。
试就湖边披草径，莫疑东海变桑田。
君讶今时尽陵陆，我看明岁更沦涟。
来今自昔无终始，人事回环常若是。
应思阙下声华日，谁谓江潭旅游子。
初贞正喜固当然，往蹇来誉宜可俟。
盈虚用舍轮舆旋，勿学灵均远问天。

和燕公岳州山城

赵冬曦

为吏恩犹旧，投沙惠此蒙。

江边悠尔处，泗上宛然同。

访道精言合，论经大义通。

鸣琴有真气，况已沐清风。

和尹懋秋夜游澗湖一

赵冬曦

政理常多暇，方舟此溯洄。

吹笙虚洞答，举楫便风催。

山暗云犹辨，潭幽月稍来。

清溪无数曲，未尽莫先回。

和尹懋秋夜游澱湖二

赵冬曦

烟霭夕微蒙，幽湾赏未穷。

舣舟待初月，褰幌招远风。

鹤声聒前浦，渔火明暗丛。

东山云壑意，不谓尔来同。

陪燕公游灊湖上寺

赵冬曦

江外多山水，招要步马来。

琴将天籁合，酒共鸟声催。

岩坐攀红药，溪行爱绿苔。

所怀非此地，游望亦裴回。

答张燕公翻着葛巾见呈之作

赵冬曦

美酒值芳春，醒余气益真。

降欢时倒履，乘兴偶翻巾。

徐榻思方建，左车理自均。

傲然歌一曲，一醉濯缨人。

奉答燕公

赵冬曦

语别意凄凄，零陵湘水西。

佳人金谷返，爱子洞庭迷。

旧馆逢花发，他山值鸟啼。

江天千里望，谁见绿蘋齐。

奉答燕公

赵冬曦

谁道零陵守，东过此地游。

友僚同省阁，昆弟接荆州。

我逐江潭雁，君随海上鸥。

屡伤神气阻，久别鬓毛秋。

疑岭春应遍，阳台雨欲收。

主人情未尽，高驾少淹留。

陪张燕公行郡竹篱

赵冬曦

良臣乃国宝，麾守去承明。

外户人无闭，浮江兽已行。

随来晋盗逸，民化蜀风清。

郭郭从彝典，州闾荷德声。

小人投天涯，流落巴丘城。

所赖中和作，优游凿与耕。

和燕公别澠湖

赵冬曦

南湖美泉石，君子玩幽奇。

湾澳陪临泛，岩岵共践窥。

秋风赧桂竦，春景绿杨垂。

郢路委分竹，湘滨拥去麾。

枉帆怀胜赏，留景惜差池。

水木且不弃，情由良可知。

奉陪张燕公登南楼

尹懋

君子每垂眷，江山共流眄。

水远林外明，岩近雾中见。

终日西北望，何处是京县。

屡登高春台，徒使泪如霰。

秋夜陪张丞相赵侍御游灊湖一

尹懋

熊轼巴陵地，鹢舟湘水浔。

江山与势远，泉石自幽深。

杳霭入天壑，冥茫见道心。

超然无俗事，清宴有空林。

秋夜陪张丞相赵侍御游澱湖二

尹懋

江上饶奇山，巘罗云水间。

风和树色杂，苔古石文斑。

巴俗将千滢，澱湖凡几湾。

嬉游竟不尽，乘月泛舟还。

同燕公泛洞庭

尹懋

风光淅淅草中飘，日彩荧荧水上摇。

幸奏潇湘云壑意，山旁容与动仙桡。

奉答燕公

王琚

郡远途且艰，宜悲良自得。

胡为心独尔，惠好在南国。

亦既清颜披，罔然良愿克。

与君兰时会，群物如藻饰。

烟景惜欢赏，云山起翰墨。

接艺奇思微，偶谈玄言直。

永日不知倦，逾旬犹谓亟。

如何酌离尊，移棹巴城侧。

浦口劳长望，舟中独太息。

疾风吹飞帆，倏忽南与北。

目尽不复见，怀哉无终极。

唯当衡峰上，遥辨湖水色。

自荆湖入朝至岳阳奉别张燕公

王琬

五载朝天子，三湘逢旧僚。

扁舟方辍棹，清论遂终朝。

远树烟间没，长江地际摇。

帝城驰梦想，归帆满风飙。

游澗湖上寺

王琚

春山临远壑，水木自幽清。

夙昔怀微尚，兹焉一放情。

云间听弄鸟，烟上摘初英。

地僻方无闷，逾知道思精。

和张燕公湘中九日登高

阴行先

重阳初启节，无射正飞灰。

寂寞风蝉至，连翩霜雁来。

山棠红叶下，岸菊紫花开。

今日桓公座，多愧孟嘉才。

奉别张岳州说一

（一作答张燕公岳州宴别）

王熊

长沙辞旧国，洞庭逢故人。

薰兰敦久要，披雾转相亲。

岁月空嗟老，江山不惜春。

忽闻黄鹤曲，更作白头新。

奉别张岳州说二

（一作答张燕公岳州宴别）

王熊

平生共风月，倏忽间山川。

不期交淡水，暂得款忘年。

兴逸方罢钓，帆开欲解船。

离心若危旆，朝夕为君悬。

入朝别张燕公

梁知微

华容佳山水，之子厌承明。

符竹纡小郡，江湖被德声。

三年计吏入，路指巴丘城。

鳧舟才结缆，驺驾已相迎。

别离他乡酒，委曲故人情。

孤屿早烟薄，长波晚气清。

辛勤方远骛，胜赏屡难并。

回瞻洞庭浦，日暮愁云生。

道峡似巫山

朱使欣

江如晓天静，石似暮云张。

征帆一流览，宛若巫山阳。

楚客思归路，秦人谪异乡。

猿鸣孤月夜，再使泪沾裳。